

Aningaasaqarnermut Ataatsimiititaliap suliaq nr. 01.31.06/08-00339 pillugu tallimannorneq ulloq 6. juni 2008-mi aalajangiinera pillugu Naalakkersuisunut ilisimatitsineq

(Naalakkersuisut ulloq 30. maj 2008-mi ataatsimiinneranni imm. 2i)

Pineqarput meeqqanut tapiissutit aamma nalinginnaasumik paaqqutarinninnermi aningaasarsiat qaffaavigineqarnerat

Naalakkersuisut inassutigaat,

Aningaasaliissutit konto pingaarnermi 20.11.70; Suliniutinut nutaanut sillimmatit, 2008-mi 7,6 mio. kroninik annikillisinneqassasut.

Aningaasaliissutit konto pingaarnermi 20.05.20; Kommuninut ataatsimoortumik tapiissutit, 2008-mi 3,0 mio. kroninik qaffanneqassasut.

Aningaasaliissutit konto pingaarnermi 30.10.32: Meeqqanut tapiissutit 2008-mi 4,6 mio. kroninik qaffanneqassasut

Aningaasaqarnermut Ataatsimiititaliap oqaaseqaatai

Isertitallit ilaannut toqqakkanut meeqqat tapisiaasa qaffanneqarnissaat kiisalu paaqqutarinninnermi nalinginnaasumik aningaasarsiat qaffanneqarnissaat suliami tassani Naalakkersuisut qinnutigaat. Qaffaanerit juulip aallaqqaataanit 2008-mi piviusunngortinnissaat eqqarsaataavoq. Konto pingaarneq 20.11.70-mi, suliniutinut nutaanut Sillimmatinut, siunertamut sillimmatit aningaasaliussat atorlugit aningaasaliineq pissaaq. Qaffaanneri Nunatta karsianut aningaasartuutit 2008-mi 8 mio. kr.-nut 2009-milu 16 mio. kr.-inut ukiunilu tullernut ataasiakkaanut aalajangivissuunngitsumik missiliorneqarput.

Ataatsimiititaliaq suliamut aalajangiitinnagu apeqqutit uku akineqarnissaat kissaatigineqarpoq: Meeqqat tapisiaannik qaffaanissaq isertitakinnerpaaginnarnut naatsorsuunneqassasoq eqqar saataavoq. Suliassaattillinnut sulisunullu tunngasumi ilinniarfinnilu qiimmassaatitit iliuuseqaaqatigiinnermilu ajornartorsiutinut ingerlanneqartunut iliuuserissamaakkanullu qaffaanissaq qanoq naleqqutigaa? Ajornartorsiutit tamakku ilaatigut siusinnerusukkut marsi 2002-mi, kiisalu 2004-mi ukiakkut pisortanit ikioorsiissutit annerpaaffilerneqarnerannut atatillugu 2008-mullu Aningaasaqarnermut nassuiaammi Kalaallit Nunaata Aningaasaqarneranut Siunnersuisoqatigiivinit uparuaavigineqarsimapput. Taamaalilluni maluginiagassatut isikkoqarpoq ajornartorsiuteqarfik taanna Naalakkersuisut qinnuteqaataanni tikinneqangimmat.

Isumaginninnikkut ikioorsiissutaannarnik tigusartaqarnermut taarsiullugu sulineq ilinniagaqarnerluunniit akilersinnasutut tamatigut isigineqartariaqartut isumaginninnikkut anguniakkat ilaattut pingaartut Naalakkersuisut suli isigaat?

Imm. 94-mik *Meeqqanut Inuusuttunullu tunngasuni tapersiisarneq tapiisarnerlu pillugit nassuiaammik*, UPA 2008-mi suliaqarnermi Ilaqutariinnermut Naalakkersuisoq oqaaseqarpoq isertitakinnerpaanut meeqqanut tapiissutit qaffanneqarnissaannut paaqqutarinninnermullu ani-ngaasarsianik qaffaanissamut 2008-mi 8 mio. kr.-nik aammalu 2009-mi suli 10 mio. kr.-inik immikkoorsitsisoqarsimasoq. Matumani aalajangikkap piviusunngortinneqarnerata kingorna taamaalilluni 2009-mi Aningaasanut inatsimmi isumaginninnermut pitsanngoriaatissani 2 mio. kr. sinnerussimapput. Aningaasat taakku qanoq atorneqassasut Naalakkersuisunut ilaasortap eqqarsaatigaa?

Aningaasaqarnermut Ataatsimiititaliap aalajangiinera

Apeqqutit qulaani oqaatigineqartut Naalakkersuisunit akineqarnissaasa utaqeqqaarneqarnissaat siunertaralugu inassuteqaatit isummerfiginissaat Aningaasaqarnermut Ataatsimiititaliap **kinguartippaa**. Juunip qaammataani ataatsimiititaliap ileqquusumik ataatsimiinnerata kingorna ullut arfinillit ingerlanerini nch@gh.gl. -mut qarasaasiakkut nuunna ilanngullugu Naalakkersuisut akissutaata kalaallisua qallunaatuualu nassiunneqassasoq qinnutigineqassaaq.

Inussiarnersumik inuulluaqquusillunga

Augusta Salling
Aningaasaqarnermut Ataatsimiititaliap siulittaasua